

Hvala Allahu, Gospodaru svjetova! Salavat i selam neka je na Allahova poslanika, Muhammeda, s.a.v.s., njegovu porodicu, ashabe i sve one koji ga slijede na putu islama!

Poštovana braćo i sestre, draga djeco i omladino, esselamu alejkum!

Uzvišeni Allah nas u Kur'anu podsjeća da nam je na ovom svijetu podario neizbrojive blagodati a da su Mu ljudi često nezahvalni na tome: „... **i ako biste Allahove blagodati brojali, ne biste ih nabrojali. - Čovjek je, uistinu, nepravedan i nezahvalan.**“ (Ibrahim, 34)

Neke od tih blagodati, poput tijela i duše, dobili smo „na lijepe oči“, a za neke blagodati, poput plate, kuće i djece, moramo se potruditi.

Neke blagodati su veće, a neke manje, ali su sve one za nas bitne, jer bez njih ne bismo mogli putovati Dunjalukom i pripremati se za Ahiret.

Nekada blagodati tražimo, a one nam budu uskraćene. Uzrok tome mogu biti naši grijesi, pa se zato trebamo kajati i od Allaha oprost tražiti.

Nekada blagodati dolaze, a mi ih i ne tražimo. To je znak da smo postali posrednici Allahove Milosti, jer Uzvišeni Allah Svoje blagodati najčešće daje preko ljudi. Zato, dio svojih

blagodati treba da podijelimo sa drugima.

Nekada blagodati dolaze odande odakle se i ne nadamo. To je posebno bitno onda kada smo u problemima i kada nam je pomoć potrebna. To je znak da je naš iman dobar i to je signal kojim nas naš Gospodar podsjeća da je On blizu i da On sve čuje, sve vidi i sve zna.

I ma koliko blagodati bile male ili velike, prema njima se treba odnositi dostojanstveno, to jest, ne treba ih u haram trošiti, niti na njima škrtariti, niti ih razbacivati. Drugim riječima, na njima treba zahvalan biti. Na to nas Svemogući Allah upozorava: „**I kad je Gospodar vaš objavio: Ako budete zahvalni, povećat ću vam blagodati. Budete li nezahvalni, kazna moja će teška biti.**“ (Ibrahim, 7)

Braćo i sestre! Da bismo Allahu zahvalni bili, moramo Ga se sjećati. A da bismo Ga se sjećali, moramo o Njegovim blagodatima razmišljati.

Nedavno je, kako pričaju, u BiH jedan dedo oko 80 g. pao u komu. Odvezli su ga u bolnicu, gdje je 24h bio uključen na aparat sa kisikom. Kada je došao sebi, malo se oporavio i mogao ići kući, ispostavljen mu je račun od nekoliko stotina BiH maraka. Tada je dedo zaplakao, a doktor koji je tu

bio prisutan ga počeo tješiti: „*Nemojte plakati! Ako nemate novac, naći ćemo neko rješenje. Imamo fond za ovakve slučajeve.*“ Kada se dedo malo smirio, reče doktoru: „*Sinko moj, nije meni problem za novac. Nego razmišljam, ako za 24h korištenja kisika treba da platim nekoliko stotina maraka, koliko sam onda Bogu dužan što sam 80 godina koristio Njegov kisik?!*“

Zato, braćo i sestre, budimo zahvalni Allahu na blagodatima, i na onima koje nam je dao i na onima koje nam je uskratio. On zna zašto ih je i dao i uskratio. To će nam život učiniti sretnijim. Prenosi se da je jedan sultan pitao svog vezira: „*Što sam ja ovako nesretan, a imam sve što poželim? A pogledaj onog mog slugu što se smješka, skoro da nema ništa, a opet je sretan.*“ A vezir mu reče: „*Poslušaj me, veliki sultanu. Večeras pred vrata njegove kuće stavi kesu sa 99 dukata, a na kesi napiši da mu poklanjaš 100.*“ Sutradan je onaj sluga došao mrzovoljan na posao. Sultan upita vezira šta se desilo, a on mu reče: „*Jadnik, kad je u toku noći našao kesu, podigao je cijelu familiju da mu pronađu onaj stoti zlatnik. Sultane, razlog što su ljudi nesretni je taj što oni ne vide blagodati koje im je Bog*

dao, već traže blagodati koje im On nije dao.“

Prenosi se da je jedan čovjek došao kod mudraca da mu se požali na svoje siromaštvo, pa ga mudrac upita: "Da li bi mi prodao svoj vid za stotinu hiljada zlatnika?" Siromah bez imalo razmišljanja odgovori negativno. Mudrac nastavi: "Prodaj mi svoj sluh za stotinu hiljada zlatnika!" Čovjek odgovori sa "ne". Zatim ga je mudrac nastavio ispitivati za ruke, noge, razum, itd. Svaki odgovor je bio negativan. Na taj mu način dokaza da je bogataš jer samo svoje tijelo cijeni na milione zlatnika.

Veliki islamski učenjak, hafiz Ibn Hadžer El-Askalani, jednog dana je prolazio čaršijom, okružen velikim brojem muslimana, u lijepom odijelu. Dok je on tako prolazio, priđe mu jedan Jevrej koji je prodavao ulje, i bio u starom, iznošenom odjelu na kojem su bile fleke od ulja. Rekao mu je: „Šejhul-islame, vaš Poslanik kaže: „**Dunjaluk je tamnica za vjernika a Džennet za nevjernika.**“ Gledajući u moje i tvoje stanje, gdje je tu tamnica a gdje Džennet?“ Ibn Hadžer, rahimehullah, mu odgovori: „**Prema onom što je Allah pripremio za mene, kao vjernika, na Ahiretu, ovo stanje u kojem sam sad je doslovno**

tamnica. A ovo u čemu si ti, je Džennet naspram onog što će te dočekati na Ahiretu, osim ako ne preseliš kao vjernik.“ Na ove riječi Jevrej primi Islam. (Munavi)

Na kraju, današnju hutbu, završit ćemo s hadisom u kojem nas Poslanik, s.a.v.s., savjetuje i kaže: **“Pogledajte u onoga tko je ispod vas, a ne u onoga tko je iznad vas, da ne bi zanijekali Allahove blagodati!”** (Ebu Hurejre - Muslim)

Braćo i sestre, budimo zahvalni Allahovi, dž.š., robovi, ne gubimo nadu u Njegovu milost! Ne dozvolimo da nas imetak odvede u zaborav i nepokornost Stvoritelju!

Molim Allaha, dž.š., da nas učini Njemu zahvalnim robovima i da nas imetak nijednog momenta u zaborav na Allaha ne odvede.

AMIN!

Prethodne hutbe potražite na našoj stranici: www.medzlis-split.org
Pripremio: Vahid ef. Hadžić na temelju hutbe
hfz.Midhat ef. Sejfića - Split, 24.8.2018.



ISLAMSKA ZAJEDNICA U HRVATSKOJ
MEDŽLIS ISLAMSKE ZAJEDNICE SPLIT

ZAHVALNOST NA BLAGODATIMA

